

Lebih 23,000 baucar buku ditebus

Inisiatif diumumkan Perdana Menteri dapat sambutan menggalakkan sejak mula dibuka

Oleh Saadiah Ismail dan Ercy Gracella Ajos
bhnews@bh.com.my

Kuala Lumpur: Lebih 23,000 pelajar di semua institusi Kementerian Pendidikan (KPM) sudah membuat penebusan baucar buku sejak mula dibuka, Jumaat lalu.

KPM dalam satu kenyataan semalam, berkata inisiatif baucar buku untuk murid atau pelajar di semua institusi di bawahnya seperti yang diumumkan Perdana Menteri, Datuk Seri Anwar Ibrahim mendapat sambutan menggalakkan sejak ia mula dibuka.

"Sehingga kini, lebih 23,000 baucar buku berjaya ditebus oleh murid atau pelajar menggunakan aplikasi DELIMa dan Kota Buku Digital.

"Tempoh sah penebusan dan penggunaan baucar buku untuk murid atau pelajar di institusi pendidikan bawah KPM adalah dari 31 Mei hingga 31 Disember 2024," katanya.

Justeru, KPM menasihati agar pelajar tidak bimbang kerana mereka mempunyai tempoh masa mencukupi untuk menebus baucar buku masing-masing dan menggunakannya bagi menda-



Pemberian baucar buku kepada pelajar di semua institusi KPM dapat bantu ringan beban ibu bapa. (Foto BERNAMA)

patkan bahan bacaan yang terbaik.

"Semoga inisiatif baucar buku ini memberi manfaat kepada semua murid atau pelajar selaras dengan hasrat kerajaan untuk melahirkan generasi berilmu, berfikiran kritis dan berwawasan," katanya.

Terdahulu, Anwar ketika berucap merasmikan Pesta Buku Antarabangsa Kuala Lumpur (PBAKL) 2024 di Pusat Dagangan Dunia Kuala Lumpur (WTCKL), mengumumkan pemberian baucar buku bernilai RM100 bagi pelajar Tahap Dua sekolah rendah, sekolah menengah hingga ke peringkat institusi pengajian tinggi (IPT).

Sementara itu, Ketua Pegawai

Eksekutif Kota Buku, Adibah Omar, berkata lebih RM500,000 e-baucar pembelian buku sudah ditebus pelajar sekolah sejak ia diumumkan.

Beliau berkata, pengumuman oleh Perdana Menteri itu disifatkan sebagai pencapaian paling berkesan disampaikan dan dilaksanakan Kerajaan MADANI dalam tempoh kurang 24 jam.

Tingkat budaya membaca

Katanya, Perdana Menteri sentiasa menekankan untuk meningkatkan budaya membaca dalam kalangan rakyat negara ini dan pemberian e-baucar ini disifatkan hadiah tidak ternilai kepada mereka yang terbabit dalam sektor perbukuan.

"Ini secara tidak langsung akan merangsang melahirkan pembaca baharu di samping mengekalkan pembaca sedia ada.

"Pada masa sama, penebusan secara pendigitalan sepenuhnya ini juga memberi impak kepada tiada ketirisan, 100 peratus dimiliki Kementerian Pendidikan (KPM) dan bersasar," katanya kepada BH, semalam.

Pelajar sekolah boleh melakukan penebusan e-baucar buku menerusi platform Kota Buku yang mempunyai 155 penjual buku dengan hampir 12,000 judul pelbagai genre.

Adibah berkata, menerusi penebusan e-baucar di platform Kota Buku juga secara tidak langsung, mendukung aspirasi pen-

demokrasi akses perbukuan yang mana semua pelajar sekolah tidak kira di mana berada boleh mendapatkan buku disukai.

"Sistem pembelian buku secara pendigitalan seperti ini tidak dilaksanakan oleh negara-negara jiran dan boleh dikatakan, Kota Buku adalah yang pertama melaksanakannya di Asia Tenggara.

"Ini adalah perkara boleh dikatakan, memenuhi apa yang rakyat nak dan Kerajaan MADANI amat menyokong industri perbukuan negara," katanya.

Sementara itu, Presiden Persatuan Penerbit Buku Malaysia (MABOPA), Syeikh Faisal Syeikh Mansor, berkata pemberian baucar buku ini dapat menyuburkan lagi budaya membaca dalam kalangan generasi muda, sekali gus menyuntik semangat membaca masyarakat menerusi aktiviti pembelian buku.

"Ia juga dapat merangsang aktiviti penerbitan buku baharu yang lebih bermutu selaras dengan saranan Perdana Menteri yang mahukan rakyat negara ini mempunyai keupayaan menilai maklumat, menguasai ilmu pengetahuan dan mencari hikmah dalam kehidupan mereka.

"MABOPA yakin industri perbukuan negara bersedia untuk sama-sama membangunkan aspirasi Perdana Menteri dan berharap program baucar buku ini diteruskan lagi pada masa akan datang dalam usaha membudayakan pembacaan berkualiti demi pembangunan masyarakat MADANI yang mampan, progresif dan berilmu," katanya.